

**PORUKE** Wolfgang Petrič o „alžirskoj grupi“ za „Avaz“

# BiH bi trebala pomoći Obami

Povratak još dvojice Alžiraca olakšao bi novom predsjedniku SAD proces zatvaranja Gvantanamo • Drago nam je što je okončana Bušova era

Nekadašnji visoki predstavnik u našoj zemlji, sada austrijski diplomata, poznati Wolfgang Petrič (Wolfgang Petritsch) pomno prati situaciju u Bosni i Hercegovini. Čak je angažiran i u vezi sa tzv. alžirskom grupom.

## Pregled pora

- Trojica od tih šest ljudi koji su bili u Gvantanamu, vraćena su svojim porodicama, a druga dvojica čekaju. BiH bi veoma mnogo pomogla i sebi i Evropi, ali i SAD, ako bi rekla - možemo riješiti eventualne probleme i s tom dvojicom. Neki od njih nemaju više bh. državljanstvo, ali imaju prijavljenu adresu boravka i samim time vaša zemlja ih je dužna prihvatiti nazad.

To bi bio, također, i gest humanosti kakav smo mi napravili devedesetih s prijemom izbjeglica s prostora Balkana - kaže Petrič za „Dnevni avaz“.

On ističe da su ti ljudi „ni krivi ni dužni proveli sedam godina u Gvantanamu“.

- Amerikanci su im temeljito pregledali i svaku poru na tijelu. I nisu im ništa uspjeli naći. Zašto ih sada ne vratiti!?

Ima još jedan vrlo važan segment ovog problema. Novoizabrani predsjednik Barak Obama (Barack) pomalo je u nezavidnoj situaciji. On želi zatvoriti Gva-



Petrič: Vjerovati u vladavinu zakona

ntanamo i potrebna mu je pomoć. Evropljani su se već javili i žele mu pomoći. BiH može vratiti i tu dvojicu ljudi i tako pomoći novom američkom predsjedniku - ističe Petrič.

## Pitanje građana

On naglašava i da je u Evropi „svima drago što je Bušova (Bush) era okončana“.

- Opet se vraćam na primjer Gvantanamo. U Bušovo vrijeme napravljeno je mnogo grešaka. U BiH se to veoma dobro vidje-

lo kroz „alžirsku grupu“.

Način na koji su oni tretirani naveo je obične građane da se zapitaju - šta to Amerikanci rade. Oni su ovamo došli da nas uče demokraciji i modernom društvu, a onda su pogriješili!? No, američki sud ispravio je grešku.

Sada Obama nastoji riješiti problem i treba mu u tome pomoći, koliko ko može - ističe Petrič i dodaje da je za BiH to poruka da se „morate držati zakona, kakvi god oni bili, jer, to je ono što pobijedi na kraju“. S. NUMANOVIĆ



Vajtmann: Dijelio novogodišnje poklone bolesnoj djeci

**Ličnost dana** Ričard Vajtmann

## Humani gest za lekciju političarima

Vratiti osmijeh na lica mališanima je osjećaj za odgovornost koju malo ko od političara u BiH ima

Komandant Štaba NATO-a u Sarajevu, američki general Ričard Vajtmann (Richard Whightman) jučer je djeci koja se liječe u Kliničkom centru Koševo dijelio novogodišnje poklone.

Vajtmann je na kliniku došao s porodicom i uživao u tome što su njegova posjeta i pokloni koje je donio na trenutak vratili osmijeh na lica mališana u bolničkim kreveticima. Humani gest američkog generala podsjeća na činjenicu da sličan znak pažnje bh. javnost odavno nije vidjela ni od

jednog bh. političara.

Vajtmannov postupak je lekcija bh. političarima da obradovati djecu, provesti s njima neko vrijeme, nije stvar političkog marketinga pred izbore, već osjećaja za odgovornost koju malo ko od političara u BiH ima.

Američki generalmajor Ričard Vajtmann junior preuzeo je funkciju visokog vojnog predstavnika u Štabu NATO-a u BiH 6. oktobra 2006. godine. Do tada je bio na brojnim visokim vojnim funkcijama. Oženjen je i ima dvije kćerke. T.L.

## Spec

● **SARAJEVO** - Federalni zavod za zapošljavanje, u saradnji sa OSCE-om, SERDA-om i kantonalnim službama za zapošljavanje, realizirao je obuku mladih za pokretanje biznisa i to u općinama Visoko, Breza, Olovo, Vareš, Kiseljak, Kreševo i Novi Grad Sarajevo.

## Ramiza Bičo nakon odluke CG o isplati odštete Samo želim znati ko mi je sina Enesa poslao u smrt

Vlada Crne Gore prekjučer je saopćila da će porodicama deportovanih Bošnjaka iz BiH, koji su 1992. godine iz svojih mjesta u istočnoj Bosni tražili spas u toj zemlji, a tamošnje vlasti ih vratile u ruke zločinca Radovana Karadžića, do kraja godine isplatiti

skoro 4,2 miliona eura odštete.

Međutim, Ramiza Bičo, majka Enesa Biče iz Goražda, kaže da porodicama gubitak najdražih ne može nadoknaditi ništa osim pravde.

- Ništa to meni ne znači, jer ja hoću da znam ko ga je poslao u smrt - kazala je Ramiza Bičo.

Njen sin je 25. maja 1992. godine iz Herceg-Novog deportovan u Foču, a samo nekoliko dana kasnije njegova supruga se porodila u Crnoj Gori, pa svoje dijete nikada nije upoznao.

Godinama je Ramiza tragala za Enesovim posmrtnim ostacima, a prepoznala ga je po ostacima košulje u masovnoj grobnici u Miljevini.

- Bila je to plava košulja kratkih rukava, a na desnoj strani bila je palma. Moj Enes tu je košulju najviše volio - kaže Ramiza. A.I.B.



Ramiza Bičo: Traži jedino pravdu

Potpis čelnog čovjeka BHRT još nije registriran u sudu

## Deretić: Nema zakonskog uporišta za odgodu ovjere

Problemi u operativnom radu Upravnog odbora

Predsjednik Upravnog odbora (UO) BHRT Nikola Deretić izjavio je za „Dnevni avaz“ da činjenica što potpis vršioca dužnosti generalnog direktora Jakova Jurjevića još nije sudski registriran donosi mnoge probleme u operativnom radu Odbora.

- Nema zakonskog uporišta za odgađanje registracije njegovog potpisa. Postojala je Privremena mjera kojom je poništena smjena generalnog direktora Mehmeda Agovića, ali je ona povučena. Ne znam zbog čega se sada čeka s registracijom, to je neshvatljivo - kaže Deretić.

Prema njegovim riječima, to je trebao uraditi Općinski sud u Sarajevu.

- Međutim, posao je stalno odgađan, uz pozivanje na Privremenu mjeru. Čekalo se i kada je ona stavljena van snage, pa je žalba upućena Kantonalnom su-



Deretić: Žalba Kantonalnom sudu

du Sarajevo - rekao je Deretić.

Upravo zbog toga što potpis nije registriran u sudu, mnoge stvari

## Brza reakcija i spora akcija

Prema Deretićevim riječima, u BiH nije postojao slučaj brže reakcije sudskih institucija kada je Agović smijenjen, odnosno sporije kada je u pitanju sudsko deponovanje Jurjevićevog potpisa.

ne mogu biti dovedene do kraja. Ipak, to nije jedini razlog zbog čega se pojedini dokumenti razmatraju i usvajaju samo okvirno.

- Recimo, kada je u pitanju Finansijski plan za 2009., koji smo okvirno usvojili na sjednici prije četiri dana, trebamo još analizirati finansijsku situaciju iz ove godine da bismo eventualno mogli predvidjeti veća sredstva u narednoj - kazao je Deretić.

Na toj sjednici UO je usvojio i planove rada Radija i Televizije (RTV) BiH za narednu godinu, dok je Plan rada Muzičke produkcije vraćen na doradu.

- O svim dokumentima, što je prirodno, ponovo će se izjašnjavati novi menadžment, ko god to bio - dodao je Deretić.

A. MUMINOVIĆ